

Sra. Lorna C. Jansen-Varlack

Juffrouw Sylvia Alicia Godett, un maestro di scol aprecia, un politico renombra, un amiga stima, a bay laga nos



DIALUNA siman pasa a drenta e tristo noticia cu Juffrouw Sylvia Godett den bida cabesante di Colegio Hilario Angela, un politico di decada 80 y dilanti y un amiga fiel di tur hende cu a yega di conoce, a bay drumi den brasa di Señor.

Juffrouw Alicia Godett conoci tambe como Juffrouw Sylvia of Sylvie a bira maestro di scol na un edad hoben y di e tempo ey el a traha cu alma y curason pa ense-

ñansa di Aruba y p'e barrio di San Nicolas en particular.

El a slaag na aña 1980 di IPA y e prome scol basico unda el a traha tabata Prinses Irene School.

Despues di esey el a bay traha na Colegio Hilario Angelana na Weg Fontein unda un par di aña despues el a bira cabesante te su final. E ultimo añanan di su bida el a sufri un kebrante di salud for di unda e no a sali 100% y cu a causa su curazon hopi dolor, pasobra e tabata haya falta di su yiunan di scol y su team.

Como politico e tabata conoci

como un "public speaker" fuerte. Un hende conoci pa ta fuerte den su expresionnan y cu tabata para pa loke e tabata kere aden y e tabata masha stima p'e hendenan di barrio.

Enseñansa tabata su pasion y esaki el a haci cu hopi dedicacion. E tabata stima su famia di scol y e tabata preocupa su mes pa e situacion social-economico cu mayoria di e alumnonan di scol tabata aden.

Un hende hopi alegre, e tabata stima participa den Carnaval y e tabata un amante di "Soca".

E tabata sa di move cada parti di su curpa riba e dushi ritmo di soca y e tabata sa con pa gosa di su bida. Un hende cu semper a expresa su pensamentonan, un hende directo, un hende di ambiente, un hende cu tabata kere den Dios. Un palabra di condolencia na su yiu Nicole, su nieta, rumannan stima y demas famia di parti di tur e cabesantenan di Scolnan Basico, su amigo y amiganan y di tur hende cu a stime.

Alicia lo nos haya bo falta, pero nos a conforma nos mes cu Dios Su boluntad. Alicia sosega na paz.